

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XXXVII Blg. 24
Disyembre 21, 2006
www.philippinerevolution.net

Editorial

Hindi titigil ang mamamayan sa paglaban sa pakanang Cha-cha


Sunud-sunod ang mga kabiguang tinatamo ng rehimeng Arroyo sa pagpipilit nitong itulak ang Cha-cha (*charter change* o pagpapalit ng konstitusyon) bago ang eleksyon sa Mayo 2007. Isa-isang nauunsiyami ang mga pinapakana nitong pamamaraan para matupad ito.

Una'y ibinasura ng Korte Suprema ang pekeng *people's initiative* na naglayong baguhin ang saligang batas sa pamamagitan ng petisyon umano ng milyun-milyong mamamayan. Nalantad ito bilang malaking panloloko ng mga alipures ni Arroyo.

Makaraang maudlot ang pekeng *people's initiative*, ilang linggo lamang ang lumipas ay sinikap namang ilusot ng mga galamay ni Arroyo sa Kongreso ang "pinasimpleng *constituent assembly*" o "*con-ass*" na pumupwera sa Senado, pasagasang magtatransporma ng Mababang Kapulungan tungo sa asembliyang magbabago sa anyo ng gubyrno mula presiden-syal tungong parlamentaryo at magpapaliban sa regular na eleksyon sa Mayo tungong Nobyembre sa ilalim na ng sistemang parlamentaryo.

Harap-harapang binaluktot ng maka-Arroyong mga kongresista ang batas at establisadong mga proseso para maipilit ito. Ang kanilang napakagarapal na manipulasyon at pambabraso para ipilit ang "pinasimpleng *con-ass*" ay umani ng matinding galit at mari-riing pagbatikos ng malawak na hanay ng mamamayan. Nagbanta ang iba't ibang sektor ng paglulunsad ng walang patid na malalaking protesta na makapagtutulak na sa rehimen sa bingit ng pagbabagsak. Napilitan si Arroyo na ipagpaliban muna ang "*con-ass*" para mapahupa ang kumukulong galit ng mamamayan.

Gayunpaman, sinikap pa rin ni Arroyo na kumam-



Mga tampok sa isyung ito...

Cha-cha, sinalubong ng protesta **PAHINA 3**

Karapatan ng Pilipinas na ibilanggo si Smith **PAHINA 5**

Kasunduang pangkapayapaan sa Nepal **PAHINA 8**

byo at agad namang itinulak ng mga sugo ng Malakanyang ang paspasang *constitutional convention*. Iminungkahi nila ang paghahalal ng mga delegado para rito sa darating na Mayo kasabay ng regular na eleksyon.

Di na ito pinalampas ng nagpupuyos na taumbayan. Bistado na nilang nasa likod ng ganitong kagarapal at kabuktot na mga manipulasyon ang pagnanasa ng kampong Arroyo na makapangunyapit pa sa poder. Mula nang pumutok ang iskandalo hinggil sa "Hello Garci" *tapes* ay naging saksi na ang mamamayan sa sunud-sunod na kasinungalingan, maruruming manipobra, garapalang pambabroso at lantarang pandarahas ng naghaharing pangkating Arroyo para makapanatili ito sa kapangyarihan.

Gayon na lamang ang pagkukumahog ng naghaharing pangkatin na isagasa ang Cha-cha at kanselahin ang nalalapit na halalan dahil sa laki ng takot ni Arroyo na malampaso ang kanyang mga kaalyado kapag matuloy ang eleksyon sa Mayo. Kapag nawala sa kamay niya ang mayorya sa Kongreso, magiging vulnerable siya sa panibagong serye ng mga prosesong li-

gal na tiyak na isusulong ng kanyang mga karibal sa pulitika, pati ng mga demokratikong pwersa at iba pang grupong sukang-suka na sa rehimeng Arroyo.

Hindi na niya basta-basta magtataktapan ang mga kaso ng lansasakang pandarambong, malawakang pandaraya sa eleksyon ng 2004, brutal na pagpaslang sa mga lider at myembro ng mga demokratikong organisasyon at paghahasik ng lagim sa hanay ng malawak na masa ng sambayanan. Mawawalan na siya ng pananggalang sa susunod na kasong *impeachment* na isasampa laban sa kanya. Lubusan siyang mahihiwalay at manganganib na mapatalsik at mapatawan ng karampatang kaparusahan.

Bukod sa pagpapataw ng batas militar at pagpapairal ng lantarang pasistang paghahari, ang Cha-cha na lamang ang tanging natitirang paraan para malampasan ni Arroyo ang bangungot na ito. Desperado siyang sumasandig dito para makapagpanatili sa kapangyarihan, matakasan ang mga pananagutan niya sa mamamayan, patuloy pang makapandambong at makapagpatupad ng ibayong mapanupil na mga hakbang upang madurog ang kanyang


mga kalaban. Para makatiyak siya sa suporta ng amo niyang imperyalistang US, lubusan na niyang isusubasta ang pambansang patrimonya at ibubukas nang husto sa dayuhang panghihimasok at kontrol ang teritoryo, ekonomya at pulitika ng Pilipinas.

Ang sunud-sunod na kabiguan ni Arroyo na maipilit pa rin ang Cha-cha bago ang eleksyon sa Mayo ay bunga ng walang humpay na pagtutol ng malawak na mamamayan at paglaban nila sa iba't ibang larangan—sa korte, sa parlamento, sa midya at iba't iba pang porum at higit sa lahat, sa lansangan.

Masigasig at puspusang kumilos ang mga patriyotiko't demokratikong pwersa, oposisyonistang anti-Arroyo, iba't ibang simbahan at iba pang napupukaw na mamamayan. Ipinararating nila ang kaniyang matinding pagkasuklam sa kasakiman sa kapangyarihan ng pangkating Arroyo, sa ubod nang bulok nitong pamamalakad, sa malupit na pagsupil sa mga batayang karapatan at sukdulang pangangayupapa sa dayuhang kapangyarihan at interes.

Batid ng napukaw nang mamamayan na hindi titigil ang rehimeng Arroyo sa kahahanap ng puwang para muling buhayin ang makailang ulit nang pinapatay na iskemang Cha-cha. Katunayan, matapos niya sabihing isasaisantabi muna ang Cha-cha ay kaagad na bumaligtad si Arroyo at nanawagan nitong Disyembre 19 ng panibagong "*people's initiative*" sa Enero. Ipinagkamali niyang palatandaan ng paghupa ng galit ng mamamayan ang di paghantong sa gahiganteng demonstrasyon ng anti-Cha-cha na *prayer rally* sa Luneta noong Disyembre 17.

Samantala, sakaling muli itong maunsiyami at matuloy pa rin ang eleksyon sa Mayo, dadayaing muli

 <p>Taon XXXVII Blg. 24 Disyembre 21, 2006</p> <p>Ang <i>Ang Bayan</i> ay inilalabas sa wikang Pilipino, Bisaya, Iloko, Hiligaynon, Waray at Ingles.</p> <p>Maaari itong i-download mula sa Philippine Revolution Web Central na matatagpuan sa:</p> <p>www.philippinerevolution.net</p> <p>Tumatanggap ang <i>Ang Bayan</i> ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan. Maaabot kami sa pamamagitan ng email sa:</p> <p>angbayan@yahoo.com</p>	
Nilalaman	
Editorial: Hindi titigil ang mamamayan sa paglaban sa Cha-cha	1
Cha-cha, sinalubong ng protesta	3
Karapatan ng Pilipinas na ibilanggo si Smith	4
Myembro ng Suara Bangsamoro, dinukot	5
Mag-asawa, nagpakamatay dahil sa tortyur	6
Komprehensibong kasunduang pangkapayapaan, pinirmahan sa Nepal	7
Matatagumpay na opensiba	10
Balita	10
<p>Ang <i>Ang Bayan</i> ay inilalathala dalawang beses bawat buwan ng Komite Sentral ng Partido Komunista ng Pilipinas</p>	

Pakanang Cha-cha, sinalubong ng serye ng mga kilos protesta

Sinalubong ng sunud-sunod na mga kilos protesta sa iba't ibang panig ng bansa ang ipinagpipilitang Cha-cha (*charter change*) ng rehimeng Arroyo at mga alipures nito sa Kongreso. Naganap ang sunud-sunod na pagkilos nitong mga huling linggo para ipamalas ng sambayanang Pilipino ang kanilang matinding pagtutol sa pinapakana ng Malakayang na ilusot ang isang konstitusyong magpapanatili kay Arroyo sa poder kundi man sa pamamagitan ng *constituent assembly* (*con-ass*) ay sa pamamagitan ng *constitutional convention* (*con-con*).

Ang malawakang *prayer-rally* sa Luneta nitong Disyembre 17 na pinamunuan ng Catholic Bishops Conference of the Philippines (CBCP) at sinuportahan ng Bagong Alyansang Makabayan at iba't ibang mga demokratikong organisasyon, National Council of Churches of the Philippines at ibang organisasyong relihiyoso at pati mga mambabatas at lider ng oposisyon ay palatandanan ng pagpupuyos pa rin ng mamamayan sa kabila ng pagtatangka ng mga galamay ni Arroyo na pahupain ang kanilang galit at idiskaril ang pagkilos. Matapos mapilitang isaisantabi ang pakanang Cha-cha, desperadong kinukumbinsi ng Malakanyang ang iba't ibang tumututol na sekta ng simbahan at ang malawak na mamamayan na huwag nang ituloy ang nakatakdang *prayer-rally* dahil patay na umano ang Cha-cha.

Sa kabila nito, dumalo pa rin ang laksa-laksang mamamayan mula sa iba't ibang sektor. Ito'y sa ka-

bila rin ng maraming mga restriksiyong ipinataw ng mga pulis sa mga dadalo rito, mga bulaang kuento tungkol sa bantang pang-gugulo umano ng mga terorista at bantang aarestuhin ang sinumang aakyat sa entablado at babatikos sa rehimeng Arroyo. Bago ito, nagtipon bandang alas-10 pa lamang ng umaga at nagdaos ng programa sa Liwasang Bonifacio ang mga kasapi ng Bayan Muna, Anakpawis, Gabriela Women's Party, BAYAN at mga alyadong organisasyon tulad ng Kilusang Mayo Uno, Kilusang Magbubukid ng Pilipinas, LFS, Anakbayan, COURAGE at ibang progresibong organisasyon. Mula rito ay nagmartsa sila patungong Luneta para sumanib sa mas malaking rali sa hapon. Sabay ding nagdaos ng *prayer-rally* sa mga *diocese* ng simbahang Katoliko sa Calamba, Laguna at Cavite City. Sa Cebu City, pinangunahan ng JIL, Philippine Independent Church at iba pang



sektang Protestante ang pagkilos.

Matapos ang *prayer-rally*, nagmartsa patungong Palasyo ng Malakanyang ang libu-libong kasapi ng partidong Bayan Muna, BAYAN at mga alyadong organisasyon nito. Dala-dala nila ang mga sulog, istriker at plakard na kumukundena sa garapalang pagtatangka ng kampong Arroyo na baluktutin ang batas at mga proseso para maipilit ang pakanang Cha-cha. Ipinanawagan nila ang pagpapataks sa rehimeng gahaman sa kapangyarihan. Hindi sila nakatuntong sa makasaysayang Tulay ng Mendiola nang harangin sila ng mga pulis sa Morayta.

Bago simulan ng mga alipures ni Arroyo ang pagpupulong para sa *con-ass* ay nagtayo na ng mga tolda ang mga magsasakang kasapi ng KMP sa paligid ng Batasan Complex upang magpahayag ng kanilang protesta. Kinabukasan, Disyembre

Sundan sa "Protesta....," pahina 4

"Editorial....," mula pahina 2

ni Arroyo ang halalan upang matiyak na nasa panig pa rin niya ang mayorya sa Kongreso at mga lokal na gubyrno. Pipilitin din niyang madagdagan ang kanyang mga kapanalig sa Senado. Dadanak ang dugo, bubwelo ang dahas at maglipana ang perang panuhol sa Mayo 2007 para makuha ni Arroyo ang mayoryang ito.

Punung-puno na ang bayan at sukdulan na ang pagkasuklam ng malawak na mamamayan sa rehimeng Arroyo. Ibayong malinaw at dumadagundong ngayon ang marining pagtutol ng iba't ibang sektor ng malawak na mamamayan sa iskemang Cha-cha at sa patuloy na paghahari ng rehimeng Arroyo. Simula lamang ng papataas na antas ng pagtutuos ang serye ng mga pagkilos nitong Disyembre. Maa-

asahan ang tuluy-tuloy at papalaki pang mga pagkilos ng lahat ng mga pwersang rebolusyonaryo, patriyotiko, demokratiko at iba pang pwersang anti-Arroyo at ng malawak na masa ng sambayanan para labanan at biguin ang imbing pakanang Cha-cha. Hindi titigil ang mamamayan sa paglaban sa paghaharing Arroyo at mga pagpapakana nito hangga't hindi ito lubusang nawawakasan. **AB**

Karapatan ng Pilipinas na ibilanggo si Smith

Pinanindigan ni Judge Benjamin Pozon ng Branch 139 ng Makati City Regional Trial Court (MCRTC) ang karapatan ng Pilipinas na ibilanggo si Lance Corporal Daniel Smith, ang Amerikanong sundalong nahatulan sa Subic *rape case*. Ibinasura muli ni Pozon nitong Disyembre 13 ang petisyong inihain ng abugado ni Smith na ilipat siya sa kustodiya ng US. Alinsunod sa desisyong ito, mananatili si Smith sa Makati City Jail. Noong Disyembre 4, hinusgahan ni Pozon si Smith na maysala ng pang-gagahasa at hinatulan siya ng habambuhay na pagkabilanggo.

Kaagad-agad ay iginiit ng mga upisyal ng US Embassy na sila dapat ang mangalaga kay Smith. Isinangkalan nila ang mga probisyon ng Visiting Forces Agreement na anila'y nagbibigay sa kanila ng karapatan na hawakan si Smith habang hindi pa tapos ang "prosesong hudisyal."

Hindi naman nagdalawang-isip ang Department of Justice (DOJ) at ang Department of Foreign Affairs (DFA) sa pagsuporta at mistulang pag-aabugado para sa US. Isang pinagsanib na pahayag ang inilabas nina US Ambassador Kristie Kenny at DOJ Secretary Raul Gonzalez na nagsasaad ng kaisahang ipailalim si Smith sa awtoridad ng US.

Ibinasura ni Judge Pozon ang

pahayag na ito at hindi siya natinag sa presyur ng US, DOJ at DFA. Pinanindigan niya na ang Pilipinas ang siyang dapat pumili ng bilangguan kung saan ikukulung si Smith. Aniya, hindi na aplikable ang sinasabing probisyon ng VFA dahil natapos na ang "prosesong hudisyal" nang mahusgahan si Smith sa panggagahasa kay "Nicole." Sinabi rin ni Judge Pozon na hindi awtorisado ang DOJ na pumasok sa isang kasunduan sa gubyrno ng US dahil ang pangulo lamang ng bansa ang may kapang-yarihan nito.

Sa pagpanig ng DOJ sa US ay lalong naging malinaw ang kawalan nito ng malasakit sa biktimgang si "Nicole" at sa interes ng mamamayang Pilipino.

Muli ring naunsiyami ang apila ng abugado ni Smith noong Disyembre 15 na ipabaligtad sa Court of Appeals (CA) ang kautusan ni Judge Pozon at ibalik sa US Embassy ang kustodiya kay Smith. Ibinasura ito ng CA nitong Disyembre 19 sa batayang hindi ito napapanahon dahil hindi pa napatunayan na arbitraryo at despotiko ang paghatol ni Judge Pozon. Taliwas sa petisyon ni Smith, naniniwala ang CA na wala siyang daranasing permanenteng kapahamakan habang siya'y nananatili sa Makati City Jail. Anito, naisagawa na ang paglilitis kung saan kinilala ang lahat ng mga karapatan ng no-o'y akusado.

Sa Disyembre 25, maghahapag ng petisyon si "Nicole," kasama ang mga dating senador na sina Sen. Jovito Salonga at Wigberto Tañada, upang hilingin sa CA na ipasa nito sa Korte Suprema ang kaso kaugnay sa pagtakda ng kustodiya kay Smith dahil labag na sa konstitusyon ng Pilipinas ang gustong mangyari ng US at ang usaping ito ay lampas na sa hurisdiksyon ng CA. **AB**

"Protesta....," mula pahina 3

12, nagmartsa ang 25,000 kasapi ng BAYAN at Laban ng Masa tungong Batasan Complex. Hinarang sila ng mga *anti-riot police* bago pa man dumating sa gusali. Samantala, nag-*walk out* ang Senate Employees Union na may 1,700 kasapi. Ayon sa kanila, gagawin nila ito araw-araw hanggang sa maibasura ang Cha-cha.

Kahit inilipat sa Disyembre 17 ang nakatakdang *prayer-rally* noong Disyembre 15 dahil inireserba na ang Luneta para sa Philippine Gaming Corporation (Pagcor) na pinallalabas na may naunang aplikasyon,

itinuloy pa rin ang mga kilos protesta sa iba't ibang panig ng bansa. Nagdaos ng mga rali sa mga *diocese* ng Novaliches, Quezon City; Malolos, Bulacan; at Balanga, Bataan.

Mga 5,000 relihiyoso, propesyunal at estudyante ang nagmartsa sa mga pangunahing kalsada ng Dagupan City bago sila nagtipon sa plasa. Sa Negros, umabot sa 30,000 ang dumalo sa mga syudad ng Bacolod, Kabankalan, San Carlos, Cadiz at Escalante sa Negros Occidental at Guihulngan sa Negros Oriental. Sa Iloilo City, nagmartsa sa pangunahing lansangan ng lunsod ang mahigit 1,000 kasapi ng BAYAN at Laban ng Masa bago sumama sa *prayer-rally*

ly na idinaos ni Archbishop Angel Lagdameo, presidente ng CBCP. Nagmartsa rin ang 800 katao sa Roxas City.

May mga pagkilos din sa Kidapawan, North Cotabato at Marbel, South Cotabato; Ozamis City; Cagayan de Oro; at Digos, Davao del Sur.

Sa sobrang takot ni Arroyo, iniutos niya ang pagtatayo ng mga tsekpoynat sa mga daan papasok ng Metro Manila. Anim na libong tropa ang itinalaga sa Luneta habang ang iba ay ipinakatat sa mga estratehikong lansangan. Maliban pa ito sa mga tropang militar na nakapaligid sa Malakanyang na nagmistulang garison noong araw na iyon. **AB**

7 patay sa loob ng dalawang linggo

Pitong aktibista ang pinaslang ng mga *death squad* ng rehimeng Arroyo sa iba't ibang bahagi ng bansa nitong nakaraang dalawang linggo. Kabilang dito ang isang myembro ng Partidong Suara Bangsamoro, mga lider-unionista sa Cavite at Mindanao, isang lider ng AnakBayan, dalawang myembro ng Bayan Muna, isang lider ng lokal na organisasyong masa at isang abugado ng karapatang-tao. Tatlong aktibista ang nasugatan sa mga pang-aatake at isa ang dinukot.

Sa dami ng mga lider at myembro ng mga progresibong organisasyong pinapaslang sa Cagayan Valley ay napabilang na ang rehiyon sa hanayan ng Central Luzon, Bicol at Southern Tagalog na may pinakamaraming biktima ng pampulitiking pamamaslang.

Disyembre 18. Dinukot ng tatlong armadong lalaking naka-*fatigue* at nakabonet ang sugatang si Rahman Camili, 34, myembro ng Suara Bangsamoro mula sa kanyang bahay sa Barangay Madaum, Tagum City. Sapilitang pumasok sa kanyang bahay nang alas-2:20 ng madaling araw ang mga salarin at tinutukan ang asawa niya. Nang makita ng mga berdugo si Camili ay bigla siyang binaril sa paa at tiyan at kinaladkad palabas. Isinakay siya sa isang kulay berdeng *van* na may plakang LFV-678. Ayon sa mga saksi, umabot sa 20 lalaking naka-*full battle gear* at nakasuot ng itim ang pumaligid sa bahay ni Camili.

Disyembre 17. Namatay sa ospital si Gerson Lastimoso, myembro ng Nagkahiusang Mamumuo sa Supaya Farm (NAMASUFA) matapos siya masugatan nang ambusin siya at apat pang kapwa unionista sa Crossing Alegria, Compostela, Compostela Valley noong Disyembre 15 ng umaga. Kasama ni Lastimoso na

inambus ang mga upisyal ng unyon na sina Vicente Barrios, presidente; Andres Lagare, bise presidente; at Aldin Cortez, *board member*; at si Doniglenn Sundon, myembro ng NAMASUFA. Bahagyang nasugatan sa pananambang sina Barrios at Cortez samantalang kritikal ang kalagayan ni Sundon. Papasok sa trabaho ang mga biktima sa Fresh Banana Agricultural Corp. (FBAC) Packing Plant 90 nang sila'y pagbabarilin.

Matatandaang patuloy ang hidwaan ng mga manggagawa at maneydsment sa FBAC na pagmamayari ng Andres Soriano Group at matagal nang nakatatanggap si Barrios ng mga pagbabanta sa kanyang buhay. Ipinaglalaban ng unyon na bayaran ang *cost of living allowance*, *holiday pay*, *service incentive* at iba pang benepisyong mga manggagawa.


Sa araw ding ito ay binaril at

tinamaan sa paa si Roque France, 64, kahahalal lamang na tagapangulo ng Dagup Igurut Asosasyon. Pinagtangkaan ang buhay ni France sa harap ng kanyang bahay sa Cabiraoan, Torkia, Gonzaga, Cagayan habang papunta siya sa rali laban sa Chacha na inorganisa ng mga militanteng grupo sa prubinsya.

Disyembre 13. Pinaslang ng anim na sundalo ng 21st IB si Nelson Asocena, 19, myembro ng AnakBayan at Caguimongan at tagapangulo ng Sangguniang Kabataan sa bayan ng Rizal, Cagayan. Ayon sa kanyang mga kapatid, pinaulanan ng bala si Asocena ng mga sundalo na kunwa'y makikinom ng tubig sa kanilang bahay sa Barangay San Juan, Rizal, Cagayan.

Ayon sa Kilusang Magbubukid ng Pilipinas (KMP), kapatid na organisasyon ng Caguimongan, tatlo pang lider ng KMP sa Cagayan—sina Pasciano Payay, Albert Himmiwat at Vilma Mangili—ang mahigpit na minamanmanan ng militar at pinangangambahang tatargetin na rin ng *death squad*.

Disyembre 12. Pinagbabaril ng dalawang lalaking nakamotor-siklo si Gil Gojol, isang abugado ng karapatang-tao, at ang kanyang drayber na si Danilo France noong alas-9:45 ng umaga sa Sityo Naduyan, Barangay Payawin, Gubat, Sorsogon habang pabalik na ang dalawa sa Sorsogon City mula sa isang pagdinig. Si Gojol, na sampung taon nang humahawak ng mga kaso ng paglabag sa karapatang-tao ay naging abugado ni Danilo Borjal noong 1996 at ni Sotero Llamas. Si Borjal ay konsultant ng National Democratic Front sa usapang pangkapayapaan sa kasalukuyan. Si Llamas naman ay





dating lider-rebolusyonaryo sa Bicol na pinaslang noong Mayo. Sa isang panahon, inalok si Gojol na maging abugado ng NDFP sa negosasyon. Siya rin ang abugado ng mamamayang bumabatikos sa pagmimina ng Lafayette sa Rapu-Rapu, Albay.

Hinarang ng mga berdugo ang *van* na sinasakyan ng mga biktima at unang pinatay ang drayber. Nakababa pa si Gojol at nakatakbo subalit nadapa siya nang masugatan. Nilapitan siya ng mga berdugo at binaril sa ulo, na agaran niyang ikinamatay.

Noong araw ding iyon ay pinatay ng mga berdugong sakay ng motorsiklo si Renato Estrella, 58, kapitan ng Barangay Atlag, Malolos City at myembro ng Bayan Muna (BM). Malaon nang pinagbabantaan ng militar si Estrella dahil sa kanyang pagtutol sa militarisasyon ng kanyang barangay at pag-suporta sa mga aktibidad ng BM at iba pang progresibong organisasyon.

Disyembre 11. Pinagbabaril ng dalawang elemento ng *death squad* si Crisanto Frivaldo, myembro ng BM, sa kanyang bahay sa Irosin, Sorsogon. Si Frivaldo ay nakababatang kapatid ni Max Frivaldo, konsehal ng Irosin at myembro rin ng BM na pinatay noong Enero 2006.

Noong araw ding iyon ay pinaslang si Jesus "Butch" Servida, 36, dating bise-presidente ng Samahang Manggagawa sa EMI-Yazaki (SME) at isa sa mga lider ng Solidarity of Cavite Workers. Pinagbabaril si Servida sa tapat mismo ng pabrika ng SME, isang pagawaan ng *semiconductors* sa Barangay Anabu 2A, Imus, Cavite. Nasugatan din sa naturang pamamaril ang kanyang mga kasama na sina Joel Sale, 32, dating myembro ng SME at Kenny Mari Severo, isang kontraktwal na

Mag-asawa, nagpakamatay dahil sa matinding tortyur

Nagpakamatay ang mag-asawang Librado at Martina Gallardo, mga lokal na lider ng United Methodist Church (UMC) sa Barangay Conversion, Pantabangan, Nueva Ecija matapos sila paulit-ulit na pahirapan ng mga elemento ng 48th IB na nagparatang na mga tagasuporta sila ng Bagong Hukbong Bayan.

Ayon sa salaysay ng kanilang mga anak sa mga myembro ng isang *fact-finding mission* ng UMC na nagpunta sa Nueva Ecija noong Nobyembre 8-10, tatlong ulit na dinampot, ininterogeyt at tinortyur ang mag-asawang Gallardo at kapatid ni Librado na si Mace-ra Villajuan noong Oktubre 9 at 10 at pilit pinatuturo ang kinalalagyan umano ng isang M16, halagang P40,000 at mga dokumento sa kabila ng pagtatanggi nila ng anumang kaalaman tungkol dito.

Pinakamatindi ang tortyur na inabot ni Librado. Matapos siya mainterogeyt noong umaga ng Oktubre 9 ay pinadalo siya sa isang pampublikong pulong kung saan siya itinuro sampu ng 40 pang mga tagabaryo na mga myembro umano ng Bayan Muna. Pagkatapos ng pulong ay dinala siya sa detatsment at pinagbubugbog siya sa dibdib, ulo at leeg, sinakal at sinakluban ng plastik ang ulo para hindi makahinga. Sa sobrang pagpapasakit ay napatae siya sa kanyang salawal.

Pinakawalan siya subalit dinala muli ng mga sundalo si Librado at ang kanyang asawa kinabukasan sa kanilang detatsment. Muling ipinailalim sa tortyur si Librado. Nagbanta rin ang mga militar na papatayin ang buo niyang pamilya kung hindi siya aamin.

Muling pinauwi si Librado subalit binalikan na naman silang mag-asawa sa kanilang bahay noong umaga ng Oktubre 11 at pini-pilit na magpunta sa detatsment. Kaysa pahirapan silang muli ay pinili ng mag-asawa na magpatiwakal sa pamamagitan ng pag-inom ng pestisidyo. Namatay sila bago sila makarating sa ospital.

Ang salaysay ay nakapaloob sa ulat ng UMC na inilabas nitong Disyembre 5.

AB

empleyado ng kumpanya.

Si Servida ay pangatlo nang lider ng unyon ng EMI-Yazaki na inambus sa loob ng nakaraang dalawang taon.

Disyembre 10. Pinaghahalug-hog at pinagnakawan ng mga elementong paniktik ng AFP ang upisina ng Bayan Muna sa Midsayap, North Cotabato. Ninakaw ng mga sundalo ang isang kompyuter, mga disket at mga dokumento. Itinaon ng mga salarin ang panloloob sa upisina nang dumalo sa selebra-

syon ng International Human Rights Day sa Kidapawan City ang mga istap nito.

Disyembre 8. Sapilitang pinauwi ng gubernong Arroyo si Brian Campbell, isang Amerikanong abugado ng mga manggagawa. Daldalo sana si Campbell sa mga aktibidad at mga kilos protesta kaugnay ng ika-12 na ASEAN Summit sa Cebu. Kararating pa lamang niya sa Ninoy Aquino International Airport nang siya'y sapilitang pasakayin sa eroplano pabalik sa Hongkong. AB



Komprehensibong kasunduang pangkapayapaan, pinirmahan sa Nepal

Pinirmahan nitong Nobyembre 22 ang Komprehensibong Kasunduang Pangkapayapaan sa pagitan ng Communist Party of Nepal-Maoist at ng bagong gubyerno ng Nepal. Ito ang bunga ng pitong-buwang negosasyon at tigil-putukan mula nang matagumpay na ibagsak ang absolutong monarkiya ni Haring Gyanendra. Ang kasunduan ay pinirmahan nina Kasamang Prachanda (Pushpa Kamal Dahal), tagapangulo ng CPN-M at Girija Prasad Koirala, Prime Minister ng Nepal.

Ayon sa CPN-M, sa pagpirma sa kasunduan ay tinatapos ang pinamunuan nitong 11-taong digmang bayan sa Nepal, na nagdulot ng pinakamabibigat na bigwas laban sa paghaharing Gyanendra. Malawak na kanayunan ng Nepal ang sinaklaw ng Pulang kapangyarihan sa pamumuno ng CPN-M at kontrol ng People's Liberation Army (PLA). Ang tagumpay sa paglaban at pagbabagsak sa paghaharing Gyanendra ay bunga ng mahusay na pamumuno ng CPN-M at pagkilos ng mga rebolusyonaryong pwersa at mamamayan ng Nepal upang puspusan, tuluy-tuloy at mahusay na maisulong

ang rebolusyonaryong armadong pakikibaka, madagundong na kilusang masa at malawak na nagkakaisang prente.

Noong Nobyembre 2005, pinangunahan ng CPN-M ang pagbu-

buo ng isang malawak na nagkakaisang prente ng iba't ibang mga demokratikong partidong nakaupo sa parlamentong binuwag ni Gyanendra. Pumaloob dito ang CPN-M at pitong parlamentaryong partidong anti-monarkiya. Sa pamamagitan nito, ibayong napalawak ang pagkakaisa ng mamamayan ng Nepal, lubos na nahiwalay si Haring Gyanendra at direktang napakilos ang milyun-milyong mamamayan sa isang pag-aalsang tumungo sa pagwawakas ng monarkiya at pagbubuo ng isang demokratikong gubyerno.

Nagpupugay ang Partido Komunista ng Pilipinas sa CPN-M, mga rebolusyonaryong pwersa at mamamayan ng Nepal sa pagkakamit ng maniningning na tagumpay na ito.

Mga potensyal sa pagsusulong ng mga demokratikong adhikain

Nilalaman ng kasunduang pangkapayapaang binuo ng CPN-M at gubyernong Koirala ang pagpapatupad ng gubyerno ng Nepal ng mga adhikain ng mamamayan ng Nepal, na siyang pangunahing laman ng programa ng CPN-M para sa demokratikong rebolusyon.


Ayon sa CPN-M, winawakasan ng kasunduan ang 238-taong paghaharing pyudal sa Nepal at pinapa-

wi ang "anumang awtoridad sa pamamahala" ng monarkiya sa bansa. Isinasaad rin nito ang pagsasagawa ng mga hakbangin upang pawiin ang mga panlipunang suliraning nakabase sa relihiyon, kasarian at caste¹. Iniluluwal ng kasunduang ito ang sitwasyong hitik sa potensyal para sa demokratikong pagbabago.

Kabilang sa mga pinagkaisahang partikular ng programang sosyo-ekonomiko ang transpormasyon ng ekonomya at lipunan upang wakasan ang lahat ng anyo ng pyudalismo. Susi rito ang patakaran ng "syentipikong programa sa reporma sa lupa" at "proteksyon at pagpaunlad ng mga pambansang industriya at mga rekurso." Kabilang din sa mga napagkasunduan ang pagtaguyod sa karapatan ng lahat ng mamamayan sa edukasyon, kalusugan, pabahay, empleyo at pagkain.

Nakasaad rin sa kasunduan ang pagpapalaya sa lahat ng detenidong pulitikal at ang pagtitiyak na makabalik ang lahat ng pinalikas na mamamayan sa kani-kanilang mga komunidad. Iimbestigahan ng isang bubuuang komisyon ang malalalang kaso ng paglabag sa karapatang-tao at mga krimen laban sa sangkatauhan at magtatakda ito ng danyos para sa mga napinsalaan sa gera.

Itinatakda ng kasunduan ang pagbubuo ng bagong gubyernong koalisyon ng lahat ng mga pwersang anti-monarkiya at antipyudal, kabilang ang mga pwersa ng CPN-M. Sa pagpasok ng CPN-M sa gubyernong koalisyon at paghawak nito sa makabuluhang bahagi ng parlamento, nakikipagkaisa at makikipagtulungan ang CPN-M sa iba't ibang demokratikong sektor upang maitulak





ang mga pagbabagong panlipunan, maisulong ang reporma sa lupa at industriyalisasyon, mapayabong ang demokrasya at maigiit ang pambansang kasarinlan at mga patakarang anti-imperyalista.

Itinakda ng kasunduan ang pagpapatawag ng isang halalan sa Mayo 2007 para buuin ang Constituent Assembly na siyang pormal na magwawakas sa monarkiya at magbabalangkas ng bagong konstitusyon para sa bubuuang koalisyong gubyrerno. Bubuuin ang isang bagong sistemang pampulitikang "nagtataguyod sa mga karapatang-tao, katarungang panlipunan at pagkakapanatay-pantay, regular na eleksyon, karpapatan sa pamamahayag, paglahok ng mamamayan at iba pang demokratikong prinsipyo." Ipatatawag pagkatapos nito ang panibagong halalan para buuin ang gubyrerno. Sa lawak ng impluwensya at kapangyarihan ng CPN-M, malaki ang posibilidad na makakamit ng CPN-M ang mapagpasyang bahagi, kundi man ang aktwal na pamumuno, sa maihahalal na permanenteng gubyrernong koalisyong.

Papaloob ang CPN-M sa isang *interim* o pansamantalang demokratikong gubyrerno sa pamumuno ni Koirala habang di pa nabubuo ang bagong konstitusyon at di pa naidaraos ang eleksyon. Bukod sa pagpasok ng mga kinatawan ng CPN-M bilang mga ministro sa ehekutibong sangay ng gubyrernong *interim*, idaragdag ang 73 kinatawan ng CPN-M sa parlamento na kinabibilangan ng 209 na kinatawan mula sa mga demokratikong partidong anti-monarkiya. Idaragdag din ang 48 kinatawan ng "lipunang sibil" na sumuporta sa pakikibaka laban sa monarkiya. Sa gayong hatian, ang CPN-M ay lalabas na isa sa dalawang partidong pumapangalawa sa laki ng namumunong Congress Party ni Prime


Minister Koirala. Magiging sinlaki ang bilang ng mga kinatawan ng CPN-M at ng Communist Party of Nepal-United Marxists-Leninists (CPN-UML), isang ligal na partidong pamparlamento.

Mga peligro sa kasunduan

Habang ang pagpasok nito sa bagong gubyrernong koalisyong ay may malaking bentahe at potensyal para sa demokratikong reporma, humaharap din ang CPN-M sa malalaking risiko at peligro, laluna kaugnay ng mga probisyon tungkol sa katayuan ng PLA at mga istruktura ng rebolusyonaryong kapangyarihang pampulitika at maging sa seguridad ng Partido at mga rebolusyonaryong pwersa.

Sa pagpapaloob ng CPN-M sa bagong gubyrerno, asahan na pusang sisikapin ng mga reaksyunaryong pwersa sa loob at labas ng Nepal na lamunin, ikulong at pahinain ang CPN-M at mga rebolusyonaryong pwersa sa mga istruktura, proseso, kalakaran at impluwensyang burgis. Asahan ding gagawin ng mga reaksyunaryo at mga imperyalista ang lahat ng hakbangin—marahas at hindi—upang mabaklas ang sandatahang lakas mula sa kontrol ng Partido at pagkatapos ay todo-todong atakehin ito at ang mga pinamumunuan nitong pwersa. May partikular ding interes ang US na maipwesto sa Nepal ang isang gubyrernong maka-US para mabuo nito ang kontrol at impluwensya sa South Asia.

Sa balangkas ng kasunduan, matitinding tunggalian ang posibleng sumiklab sa pagitan ng CPN-M at mga reaksyunaryo sa loob at labas ng bagong gubyrerno at ng



sandatahang pwersa nito. Maaari itong ibunga ng isasagawang pagtipon ng lahat ng mga pwersa ng PLA sa mga takdang kampo, pagkakandado ng kanilang mga armas, pagbabaklas ng mga istruktura ng rebolusyonaryong kapangyarihan, at proseso ng napagkasunduang integrasyon ng PLA sa Nepal Army (ang dating Royal Nepal Army ng monarkiya na nasa kontrol ng bagong gubyrerno). Sa isang panig, tiyak na sisikapin ng mga reaksyunaryo na lusawin ang independyenteng armadong lakas ng CPN-M at ipailalim ang mga rebolusyonaryong pwersa sa armadong kontrol ng burgesy. Sa kabilang panig, malaking hamon sa CPN-M kung paanong mamamantine pa rin sa ganitong kalagayan ang absolutong pamumuno at independyenteng kontrol sa mga pwersa ng PLA at sikaping mapailalim sa impluwensya nito ang Nepal Army.

Nakasaad sa kasunduan na habang hindi pa naisasakatuparan ang pagsasanib nito sa Nepal Army, pananatilihin ang mga pwersa ng PLA sa pitong *cantonment* o malalawak na kampong militar sa iba't ibang lugar sa bansa. Ang kalakhan ng deklaradong armas nito ay ilalagak sa mga nakakandadong imbakahan at ang susi ay kanilang hahawakan. Pahihintulutan lamang silang hawakan ang mga armas na gagamitin sa pagbabantay sa mga nakakandong sandata nila.

Ang pagkain at iba pang probisyon at pangangailangan ng mga pwersa ng PLA sa mga kampo ay sasagutin ng gubyrerno. Susubaybayan ng mga kinatawan ng United Nations ang prosesong ito. Ituturing na iligal ang lahat ng iba pang armas na hindi hawak ng Nepal Army, kabilang ang mga patuloy na hahawakan ng mga milisyang bayan



sa ilalim ng PLA.

Ikakandado rin sa gayong paraan ang katumbas na bilang ng mga armas ng Nepal Army. Pero dahil mayroong 90,000 armas ang Nepal Army (tatlong ulit o higit pa kaysa sa mga regular na pwersa ng PLA), ang probisyong ito ng kasunduan ay sadyang mas nasa bentahe ng Nepal Army. Bukod rito, habang nagtatalaga, ang paglalagi ng PLA sa mga kampo ay maaaring magresulta sa pagkakahiwalay nito sa masa at mga kabisadong lugar ng paglaban, pagsandig sa gubyrno para sa kanilang pangangailangan, at posibleng pagpurol at paghina sa kahan-daan sa rebolusyonaryong armadong pakikibaka.

Sa kabilang panig, nakasaad sa kasunduan ang reoryentasyon at pagpapanibago ng istruktura ng Nepal Army "alinsunod sa mga demokratikong prinsipyo." Idaraan sa "rehabilitasyon" ang mga mandirigma ng PLA at isasanib sa Nepal Army matapos silang masuri. Habang maaaring samantalain ito ng CPN-M sa pamamagitan ng pagmumulat at pag-oorganisa sa hanay ng Nepal Army, tiyak na hindi ito basta-basta pahihintulutan ng mga militarista at ultra-reaksyunaryo sa militar at gubyrno ng Nepal, at maging ng mga imperyalistang may lumalaking interes ngayon sa Nepal.

Kung hindi makukuha ng CPN-M ang kumand sa kabuuan ng pagsasanibing hukbo o kahit mapagpasyang impluwensya sa signipikanteng bahagi nito, at hindi rin mapananatili ng CPN-M ang independyenteng absolutong pamumuno sa mga pwersa ng PLA, may panganib na malunod

silang sa loob ng Nepal Army at tuluyan nang maglaho.

Minamadali ng gubyrno ang pagkakandado ng mga armas ng PLA. Ginagamit ito ngayong kundisyon bago ipaloob ang mga kinatawan ng CPN-M sa gubyrno, na batay sa kasunduan ay dapat nagsimula na noon pang Disyembre 1. Mababalam pa ang pagpapatupad nito dahil ayon sa United Nations, maaantala nang ilang linggo ang pagdating ng kanilang mga kinatawan sa Nepal.

Nakasaad rin sa kasunduan ang pagbubuwag ng kapangyarihang pampulitikang itinayo at pinamumunuan ng CPN-M, na siyang nangingibabaw sa malalawak na rebolusyonaryong base sa kanayunan. Sa isang panig, maaaring maipagpatuloy ng CPN-M ang pamumuno sa mga pwersa at mamamayan sa mga baseng ito sa pamamagitan ng sariling pag-oorganisa ng Partido, pagsusulong ng kilusang masa at pagtiyak na mahahawakan nito ang lokal na pamahalaan sa ilalim ng gubyrnong koalisyon.

Sa kabilang panig, kung walang masasandigang armadong pwersang nasa ilalim ng pamumuno ng CPN-M, malaki ang peligrong lubusang mabuwag ang mga ito, mauk-ok ng bulok na reaksyunaryong pulitika, mapawi ang tuwirang pamumuno at impluwensya ng CPN-M sa masa at maglaho ang sariling lakas sa kasalukuyang mga base nito.

Di rin maliit ang peligrong maaaring ibunga ng pagsang-ayon ng CPN-M na ipaubaya ang kaligtasan ng mga lider at pwersa nito sa Nepal Army. Sa harap ng kawalan ng

...susing usapin ang patuloy na mahigpit na paghawak ng rebolusyonaryong partido sa sandata at absolutong pamumuno nito sa sariling hukbo.

proteksyong maibibigay ng sariling hukbo at pwersang panseguridad, di maliit ang posibleng panganib na idulot nito sa kaligtasan ng mga lantad nang lider at pwersa ng CPN-M, kabilang na ang hukbo nito. Posibleng samantalain ito ng mga ultra-reaksyunaryo, mga pwersa ng napabagsak na monarkiya, ng CIA o iba pang kontra-rebolusyonaryong pwersang lokal at dayuhan.

Sa pagkakamit ng kapangyarihang pampulitika at laluna sa patuloy na pagtangan nito, susing usapin ang patuloy na mahigpit na paghawak ng rebolusyonaryong partido sa sandata at absolutong pamumuno nito sa sariling hukbo. Ito ang isinasaad ni Mao Zedong nang ideklara niyang "Ang kapangyarihang pampulitika ay umuusbong mula sa baril." Bilang isang partidong nagtataguyod sa mga prinsipyo ng Marxismo-Leninismo-Maoismo, malaking hamon ang kakaharapin ng CPN-M sa pagpasok sa bagong sitwasyon, sa pagiging isang hayag na Partido at sa pagsasanib nito sa isang gubyrno sa kundisyong nakakandado ang armas ng hukbo nito.

Ang matatag at matalas na paghawak at akmanang riyalistikong aplikasyon ng mga prinsipyo sa pagharap ng CPN-M sa pinapasok nitong bagong sitwasyon sa Nepal ay maging mapagpasya hindi lamang sa lubos na pagsusulong ng mga demokratikong reporma, kundi pati sa pangangalaga ng mga ito at pagkakamit ng higit pang mga rebolusyonaryong tagumpay sa hinaharap. **AB**

1 Caste - Sistema ng paghahati-hati ng lipunang Hindu na pinagbabatayan ng malupit na pagsasamantala at pang-aapi ng mga nasa matataas na andana ng *caste* sa mga nasa pinakamabababa. Isinasaad sa mga upisyal na dokumento ng estado ang *caste* na kinabibilangan ng bawat indibidwal batay sa uring pinanganakan. Alinsunod sa sistemang *caste*, ang mga galing sa pinakamabababang uri ay bawal makihalubilo o makakanti man lamang ng mga galing sa matataas na uri.



Ambus at disarma sa North Central Mindanao

Nakasamsam ng apat na malalakas na armas ang mga Pulang mandirigma ng Bagong Hukbong Bayan (BHB) sa North Central Mindanao sa isinagawa nilang pananambang at operasyong disarma nitong Disyembre laban sa mga pwersa ng reaksyunaryong gubyerno.

Ayon sa ulat ni Ka Cesar Renerio, tagapagsalita ng National Democratic Front ng North Central Mindanao, isang M14 at isang karbin ang nasamsam ng Rexan Perez Command noong Disyembre 7 nang disarmahan nito ang isang elemento ng Civilian Armed Forces Geographical Unit (CAFGU) sa Silae, Malaybalay City.

Nakumpiska naman ng isang iskward ng BHB sa ilalim ng Eking Balacuit Command ang isang M203 *grenade launcher* at isang M16 sa ambus na inilunsad noong Disyembre 4 sa Barangay Tinagaan, Salay, Misamis Oriental. Lulan ng isang sasakyan ang apat na sundalo ng 8th IB ng Philippine Army nang tambangan sila bandang alas-2:40 ng hapon. Dalawang elemento ng militar ang nasugatan habang kumaripas ng takbo ang dalawa pang sundalo sabay iwan ng kanilang mga sandata.

Pananambang sa Masbate

APAT ang napatay na mga elemento ng 507th Provincial Mobile Group ng Philippine National Police (PNP) sa ambus na inilunsad ng BHB sa Placer, Masbate nitong Disyembre 17 ng hapon. Ayon sa mga panimulang ulat, dumaraan ang mga pulis sakay ng isang bangkang de-motor sa baybayin ng Barangay Manlut-od bandang ala-5:40 ng hapon nang paputukan sila ng mga Pulang gerilya.

Panukalang bansagang "komunista" ang BM, iba pa, binatikos

BINATIKOS ni Cong. Satur Ocampo ng Bayan Muna ang panukala ni National Security Adviser Norberto Gonzales na upisyal na bansagang "mga komunista" o mga "prenteng organisasyon ng mga komunista" ang Bayan Muna, Anakpawis at Gabriela Women's Party. Ayon kay Ocampo, lalo lamang nitong inuudyok ang militar na gawing target ng pamamaslang ang mga partidong ito.

Layunin ng panukalang ito ni Gonzales na gawing upisyal ang malaon na niyang iginigiit na ipabilang o iugnay sa armadong kilusan ang mga ligal na progresibong partido at organisasyon.

Tinukoy ni Ocampo na ang mahigit 800 biktima ng ekstrahudisyal na pamamaslang ng mga *death squad* ng estado mula 2001 ay pawang binansagang mga komunista bago sila pinatay. Sa gayon, ani Ocampo, animo'y hatol ng kamatayan ang mabansagang maka-Kaliwa o komunista.

12th ASEAN Summit, kinansela

BIGLAANG kinansela ni Gloria Macapagal-Arroyo ang ika-12 ASEAN (Association of South East Asian Nations) Summit noong Disyembre 8, dalawang araw bago ang nakatakdang pagpupulong sa Cebu City ng mga lider ng sampung kasaping bansa. Walang naniwala na ang paparating noon na bagyong "Seniang" ang dahilan ng kanselasyon nito tungong Enero.

Pampulitikang bagyo ang dahilan ng biglaang kanselasyon, ayon sa Bagong Alyansang Makabayan (BAYAN)-Central Visayas. Bago ang pagpapaliban ng ASEAN Summit, nagsisimula na ang mga kilos protesta sa Cebu City laban sa globalisasyon at iba pang imperyalistang dikta at nagsisimula na rin ang pagkulo sa Kamaynilaan ng mga pagkilos bunga ng pagraratsada ng mga alipures ni Arroyo sa Kongreso sa "pinasimpleng *con-ass*".

Dismayadong nagsiuwian ang mga dayuhang delegado ilang oras pagkatapos mapabatid sa kanila ang kanselasyon. Isa lamang si Akira Amari, isang ministro ng Japan na hindi makapaniwala sa rasong ibinigay ni Arroyo. Aniya, natatakot si Arroyo sa mga pagbabanta ng "mga terorista" kaya hindi itinuloy ang 12th ASEAN Summit. Kinatigan ito ni Prime Minister Hun Sen ng Cambodia. Nawalan na ng kredibilidad ang gubyerno ng Pilipinas dahil dito, ayon sa isang pahayagan sa Thailand.

Samantala, itinuloy pa rin ng International League of Peoples' Struggle (ILPS) ang kanilang kontra-kumperensya laban sa militarismo ng US at gera laban sa terorismo. Tinalakay ng 130 delegado mula sa 20 bansa ang mga implikasyon ng pandaigdigang gera ng US at nagkaisa sa mga pamamaraan para labanan ito. Inilunsad ang kampanya sa East Asia at Oceania laban sa base militar ng US. Ang US ay may 850 base militar sa 138 bansa sa buong mundo.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XXXVII Blg. 24
Disyembre 21, 2006
www.philippinerevolution.net

Editorial

Hindi titigil ang mamamayan sa paglaban sa pakanang Cha-cha


Sunud-sunod ang mga kabiguang tinatamo ng rehimeng Arroyo sa pagpipilit nitong itulak ang Cha-cha (*charter change* o pagpapalit ng konstitusyon) bago ang eleksyon sa Mayo 2007. Isa-isang nauunsyami ang mga pinapakana nitong pamamaraan para matupad ito.

Una'y ibinasura ng Korte Suprema ang pekeng *people's initiative* na naglayong baguhin ang saligang batas sa pamamagitan ng petisyon umano ng milyun-milyong mamamayan. Nalantad ito bilang malaking panloloko ng mga alipures ni Arroyo.

Makaraang maudlot ang pekeng *people's initiative*, ilang linggo lamang ang lumipas ay sinikap namang ilusot ng mga galamay ni Arroyo sa Kongreso ang "pinasimpleng *constituent assembly*" o "*con-ass*" na pumupwera sa Senado, pasagasang magtatransporma ng Mababang Kapulungan tungo sa asembliyang magbabago sa anyo ng guberno mula presiden-syal tungong parlamentaryo at magpapaliban sa regular na eleksyon sa Mayo tungong Nobyembre sa ilalim na ng sistemang parlamentaryo.

Harap-harapang binaluktot ng maka-Arroyong mga kongresista ang batas at establisadong mga proseso para maipilit ito. Ang kanilang napakagarapal na manipulasyon at pambabraso para ipilit ang "pinasimpleng *con-ass*" ay umani ng matinding galit at mari-riing pagbatikos ng malawak na hanay ng mamamayan. Nagbanta ang iba't ibang sektor ng paglulunsad ng walang patid na malalaking protesta na makapagtutulak na sa rehimen sa bingit ng pagbabagsak. Napilitan si Arroyo na ipagpaliban muna ang "*con-ass*" para mapahupa ang kumukulong galit ng mamamayan.

Gayunpaman, sinikap pa rin ni Arroyo na kumam-



Mga tampok sa isyung ito...

Cha-cha, sinalubong ng protesta **PAHINA 3**

Karapatan ng Pilipinas na ibilanggo si Smith **PAHINA 5**

Kasunduang pangkapayapaan sa Nepal **PAHINA 8**

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa *angbayan@yahoo.com*